

Ramalan 9

Soalan: Sekolah kamu telah mengadakan "Kempen Bahasa Malaysia". Ceritakan tentang aktiviti yang telah dijalankan di sekolah kamu.

Pendahuluan

- mengadakan Kempen Bahasa Malaysia

Isi-isi Penting

- merasmikan Kempen Bahasa Malaysia
- mengamalkan penggunaan bahasa secara sopan
- pelbagai aktiviti diadakan
- persembahan tarian Melayu

Penutup

- penyampaian hadiah dan majlis perasmian penutup oleh guru besar

Jawapan Lengkap

Sekolah saya telah mengadakan Kempen Bahasa Malaysia anjuran Persatuan Bahasa Malaysia. Kempen Bahasa Malaysia itu diadakan selama seminggu.

Guru besar telah merasmikan Kempen Bahasa Malaysia pada waktu perhimpunan yang diadakan di sekolah kami. Beliau berharap murid-murid dan guru-guru dapat memartabatkan Bahasa Malaysia dengan mengamalkan penggunaan bahasa secara sopan.

Pelbagai aktiviti telah diadakan di sepanjang minggu tersebut. Antara aktiviti-aktiviti yang diadakan ialah pertandingan mengarang, pertandingan berbalas pantun, pertandingan teka silang kata dan pertandingan syarahan.

Selain itu, persembahan tarian Melayu seperti tarian zapin dan tarian lilin turut diadakan bagi memeriahkan Kempen Bahasa Malaysia itu. Di samping itu, semua guru dan murid diwajibkan menggunakan bahasa Malaysia dengan betul dan sopan apabila bertemu di mana-mana sahaja di dalam kawasan sekolah.

Para pemenang setiap pertandingan telah menerima hadiah yang disampaikan oleh Guru Penolong Kanan 1 dalam majlis perasmian penutup Kempen Bahasa Malaysia itu. Beliau berharap generasi muda terus mencintai bahasa Malaysia walaupun kempen itu telah berakhir.

Ramalan 10

Aktiviti di sekolah (Bengkel Kecemerlangan Akademik)

Latihan :

Satu program kecemerlangan akademik telah diadakan oleh pihak sekolah kamu dengan kerjasama Persatuan Ibu Bapa dan Guru (PIBG) di sekolah. Kamu telah ditugaskan untuk menulis berita tentang program kecemerlangan akademik tersebut.

Rangka karangan :

Pendahuluan : tempat peristiwa dan tarikh - Program Kecemerlangan Akademik

Idea 1 : lokasi program kecemerlangan diadakan - jangka masa program - perasmii
program

Idea 2 : objektif program kecemerlangan - teknik menjawab soalan - berdisiplin
dan yakin diri

Idea 3 : pelbagai bentuk aktiviti - ceramah, bengkel, renungan - dikendalikan oleh
Guru Pakar

Idea 4 : menurut seorang peserta - memperoleh banyak ilmu - yakin untuk menghadapi
UPSR

Penutup : upacara penutup program - Yang Dipertua PIBG - cemerlang, disiplin, pekerti
mulia

Karangan Lengkap :

ALOR SETAR, Sabtu - Sekolah Kebangsaan Taman Mergong Jaya dengan kerjasama Persatuan Ibu Bapa dan Guru (PIBG) sekolah terbabit mengadakan Program Kecemerlangan Akademik yang bermula pada 20 April 2012 dan berakhir pada 21 April 2012. Program ini dihadiri oleh 85 orang murid. Program tersebut mendapat sambutan yang amat memuaskan daripada ibu bapa dan penjaga murid.

Program Kecemerlangan Akademik yang berlangsung di bangunan Menara Jaya di sini telah dirasmikan oleh Ketua Sektor Pengurusan Akademik, Jabatan Pelajaran Negeri Kedah. Tuan Haji Asmee bin Haji Tajuddin. Menurut Tuan Haji Asmee, objektif program ini untuk memberi pendedahan kepada peserta tentang teknik belajar yang berkesan. Para peserta juga dibimbing tentang cara menjawab soalan UPSR yang betul dan pengurusan masa yang baik. Selain itu, program ini bertujuan untuk meningkatkan disiplin dan yakin diri dalam kalangan murid.

Program Kecemerlangan ini diisi dan disuntik dengan pelbagai bentuk serta teknik penyampaian ilmu yang berkesan. Antaranya termasuklah ceramah, bengkel, kembara akademik, dan sesi renungan. Seramai enam orang guru yang berpengalaman dan mempunyai kepakaran dalam bidang masing-masing telah mengendalikan program kecemerlangan akademik ini.

Menurut seorang peserta program, Dhia Irdina binti Ahmad Rafaei, dia berasa sungguh gembira kerana berpeluang untuk mengikuti program tersebut. Menurutnya lagi, setelah mengikuti program tersebut, dia memperoleh banyak tip pembelajaran. Di samping itu, dia juga lebih berkeyakinan untuk menghadapi peperiksaan UPSR yang akan datang.

Upacara perasmian penutup Program Kecemerlangan Akademik ini telah disempurnakan oleh Yang Dipertua PIBG Sekolah Kebangsaan Taman Mergong Jaya, Tuan Haji Arif bin Ahmad Saufi. Beliau mengharapkan program ini dapat melahirkan murid yang cemerlang, berdisiplin, dan bepekerti mulia.

Ramalan 11

Aktiviti di sekolah - majlis perpisahan Tahun Enam.

Yang dihormati Tuan Pengerusi Majlis, Yang Berusaha Tuan Guru Besar, guru-guru serta rakan-rakan sekalian. Terima kasih saya ucapkan kepada rakan-rakan kerana memberi peluang kepada saya untuk berucap dalam majlis perpisahan ini.

Hadirin sekalian,

Sudah hampir 6 tahun kami berada di sekolah ini. Jika menghitung hari persekolahan, bermakna tinggal 6 hari lagi kami menjadi warga sekolah ini. Justeru, kami terpaksa mengucapkan selamat tinggal kepada guru-guru dan adik-adik yang dikasihi walaupun kami masih terlalu sayang untuk meninggalkan sekolah ini.

Kami amat menghargai akan jasa guru-guru di sekolah ini yang mendidik kami dengan penuh dedikasi, sabar, dan penuh kasih sayang. Dengan didikan dan bimbingan gurulah kami telah tahu membaca, menulis, dan megira. Kami akan sentiasa mengingati pesanan guru-guru yang ingin melihat kami menjadi insan yang berakhlak dan berguna kepada masyarakat dan negara.

Hadirin sekalian .

Budi yang guru-guru taburkan tidak mampu kami membalasnya. Hanya doa untuk kesejahteraan sahaja yang mampu kami lakukan sebagai membalas segala jasa guru-guru itu. Kami berjanji akan terus belajar dengan bersungguh-sungguh sehingga mencapai kejayaan yang cemerlang di sekolah menengah nanti.

Akhir kata saya mewakili rakan-rakan memohon maaf atas segala kesilapan dan kesalahan sepanjang kami berada di sekolah ini. Halalkan segala ilmu yang guru-guru curahkan kepada kami. Kami berasa sangat sedih kerana terpaksa meniggalkan sekolah ini. Jasa dan bakti guru-guru akan kami kenang sehingga akhir hayat kami.

Sebelum saya mengundur diri terimalah serangkap pantun daripada saya;

Ramai orang menanam padi,
Padi ditanam hingga ke seberang,
Banyak budi perkara budi,
Budimu guru dikenang orang.

Sekian, terima kasih.

Ramalan 12

Ucapan : Majlis Perpindahan Guru Kelas

Guru kelas kamu akan berpindah ke sekolah lain. Sebagai Ketua Kelas, kamu diminta menyampaikan ucapan dalam satu majlis perpisahan.

Yang dihormat Tuan Pengerusi Majlis, yang berusaha Tuan Guru Besar, yang dikasihi guru-guru, yang disayangi Cikgu Ahmad iaitu guru kelas serta rakan-rakan sekalian.

Terlebih dahulu, saya ingin mengucapkan terima kasih kerana diberi peluang mewakili murid kelas 6 Alpha untuk berucap dalam majlis perpisahan ini. Kami semua berasa sungguh terkejut dan sedih apabila mendengar berita perpindahan guru kelas kami.

Hadirin sekalian,

Cikgu Ahmad sudah lama berkhidmat di sekolah ini. Beliau mengajar kami mata pelajaran Bahasa Melayu. Selain itu, beliau juga mengajar kami mata pelajaran Kajian Tempatan.

Cikgu Ahmad seorang yang sangat baik dan penyayang. Beliau juga merupakan guru yang berdedikasi. Beliau mengajar kami dengan bersungguh-sungguh.

Cikgu Ahmad telah banyak menyumbang jasa kepada sekolah kita. Banyak murid tahun 6 mendapat gred A dalam mata pelajaran Bahasa Melayu. Ini disebabkan usaha beliau yang gigih mengajar kami tanpa jemu.

Hadirin yang dihormati,

Cikgu Ahmad merupakan guru penasihat pasukan bola sepak SK Kerteh. Beliau selalu melatih pemain bola sepak untuk meningkatkan kemahiran dan stamina. Pada tahun 2014, kita telah mendapat johan bagi Pertandingan Bola Sepak bawah 12 Tahun peringkat kebangsaan.

Kami mendoakan semoga cikgu gembira dan bahagia di sekolah baharu. Kami akan sentiasaingati cikgu. Saya akhiri ucapan saya dengan serangkap pantun:

Hari ini hari Ahad

Lusa hari Selasa

Terima kasih Cikgu Ahmad

Jasa cikgu kami tak lupa

Sekian, terima kasih.

Pengalaman mengunjungi ke satu tempat yang menarik

Pada cuti sekolah yang lalu, saya dan keluarga bercuti di Melaka. Kami menaiki kereta bapa. Kami bertolak pada pukul 12 tengah hari.

Selepas beberapa jam, kami tiba di destinasi. Kami menginap di "Homestay Taman Limbungan Permai" selama 3 hari 2 malam. Setelah menyimpan barang, kami makan tengah hari di sebuah restoran yang terkenal. Bapa memesan nasi ayam dan satu jag air sirap.

Setelah makan tengah hari, kami melawat Kota A'famosa. Saya dapat mempelajari tentang sejarah Melaka. Selepas itu, kami makan malam di sebuah restoran Kopitiam.

Pada keesokan harinya, kami pergi bermandi-manda di Melaka Wonderland. Banyak aktiviti yang di adakan disana. Di sana, bapa, adik dan saya memasuki pertandingan yang dianjurkan oleh Kelab Upin-Ipin. Kami telah menjadi juara dalam acara tersebut. Setelah penat bermandi-manda, kami makan petang di restoran KFC di Dataran Pahlawan. Pada sebelah malam, kami membeli baju untuk dijadikan kenangan.

Pada hari yang terakhir, kami pulang ke Kuala Lumpur. Saya berharap agar dapat berkunjung lagi ke Negeri Melaka pada masa hadapan.

Ramalan 14

Membaca Jambatan Ilmu

Membaca merupakan salah satu tabiat yang amat berfaedah. Mereka yang mempunyai tabiat ini dapat banyak kelebihan dan manfaat.

Seseorang yang suka membaca mempunyai **minda yang sihat dan positif**. Bahan bacaan seperti buku-buku ilmiah dan majalah boleh merangsang pemikiran kita. Oleh itu, pemikiran kita sentiasa kreatif, kritis dan mempunyai wawasan.

Tabiat suka membaca juga boleh **meningkatkan perbendaharaan kata**. Misalnya, kita boleh membaca buku-buku cerita, novel dan majalah. Perbendaharaan kata yang meluas baik dalam bahasa Malaysia mahu pun bahasa Inggeris akan meningkatkan kemampuan kita untuk berkomunikasi secara lisan ataupun bertulis.

Di samping itu, tabiat suka membaca boleh **menambah pengetahuan kita**. Contohnya, jika kita sering membaca buku-buku berkaitan sains dan sejarah. Dengan itu, pengetahuan tentang konsep sains dan sejarah boleh ditingkatkan dan sekali gus membantu dalam proses pembelajaran di sekolah.

Seterusnya, tabiat suka membaca boleh **mengisi masa lapang** kita dengan berfaedah. Membaca buku-buku pelajaran, majalah dan buku cerita amat bermanfaat kepada kita daripada membuang masa dengan bermain atau menonton televisyen sahaja. Oleh itu, masa lapang kita tidak akan terbuang dengan sia-sia.

Kesimpulannya, tabiat membaca memang mempunyai banyak kelebihan. Maka kita harus memupuk tabiat suka membaca ini sejak kecil lagi. Bak kata orang bijak pandai, “membaca jambatan ilmu”.

Ramalan 15

Kepentingan kokurikulum

Kokurikulum ialah aktiviti di luar kelas. Contoh aktiviti kokurikulum ialah perkhemahan, bersukan, berpesatuan dan sebagainya. Aktiviti kokurikulum mengajar kita untuk berdikari.

Kokurikulum dapat **menambahkan pengetahuan dan pengalaman**. Kita akan belajar tentang latar belakang sukan atau persatuan, matlamat ia ditubuhkan, dan sebagainya. Aktiviti yang disertai seperti perkhemahan, dan lawatan dapat menambahkan pengetahuan dan pengalaman hidup.

Kokurikulum dapat **mengisi masa lapang dengan berfaedah**. Kita tidak membuang masa dengan melakukan perkara sia-sia. Aktiviti kokurikulum yang diadakan diluar waktu sekolah menghindarkan murid dari terdedah kepada unsur negatif yang terdapat di persekitaran.

Selain itu, aktiviti kokurikulum boleh **menyihatkan badan dengan melalui aktiviti sukan**. Bersukan akan membuatkan badan kita sihat dan otak kita cerdas. Bersukan juga boleh meningkatkan prestasi diri.

Akhir sekali, kokurikulum mampu **mendisiplinkan serta membentuk peribadi diri yang mulia** untuk diri kita. Ia mengajar murid menepati masa, bantu membantu antara satu sama lain, bertanggungjawab dan amanah dalam melakukan tugas.

Setiap murid harus menyertai aktiviti kokurikulum kerana ia membentuk murid berakhlak mulia dan memupuk jati diri. Aktiviti kokurikulum juga harus diperluas bagi memberikan lebih banyak faedah kepada murid-murid.

Ramalan 16

Kelebihan sukan / riadah

Bersukan merupakan aktiviti riadah yang dapat mengeluarkan peluh daripada tubuh badan kita. Malah, kerajaan menggalakkan rakyatnya sentiasa melibatkan diri dengan aktiviti sukan. Hal ini kerana melalui bersukan banyak faedah yang kita perolehi.

Salah satu daripada faedahnya ialah dapat **menyihatkan tubuh badan**. Apabila kita berakreasi seperti berbasikal, bermain badminton dan sebagainya, badan akan mengeluarkan peluh dan berlaku pembakaran lemak dalam tubuh kita. Kesannya, badan kita menjadi sihat dan cergas serta tidak berasa lesu ketika belajar di dalam kelas.

Seterusnya, melalui bersukan kita dapat **mengeratkan hubungan dan menambah kenalan**. Kita dapat berkenalan dengan sesiapa sahaja tidak mengira umur, bangsa mahupun agama. Kebiasaannya, ketika kita berjoging di taman-taman, kita akan bertegur sapa dengan individu yang berada di kawasan itu. Hal ini akan mengeratkan hubungan dan perpaduan antara kaum dapat dipupuk.

Selain itu, bersukan juga merupakan aktiviti **mengisi masa lapang secara bermanfaat**. Sesi latihan permainan atau beriadah biasanya dijalankan ketika waktu lapang. Kesibukan kita menyertai sesi latihan dan beriadah dapat menghindarkan diri daripada terjebak dalam gejala sosial.

Di samping itu, dengan bersukan kita dapat **mengharumkan nama sekolah**. Sekiranya kita berbakat dalam bidang sukan, kita akan dapat mewakili pasukan sekolah, daerah, negeri mahupun negara. Apabila kita berjaya memenangi mana-mana kejohanan sukan, maka kita telah berjaya mengharumkan nama sekolah. Nama kita juga kian dikenali dan rezeki makin bertambah.

Kesimpulannya, tiada menjadi kerugian jika kita aktif bersukan. Marilah kita bersama-sama menyahut seruan kerajaan untuk menjadikan rakyat Malaysia masyarakat yang cerdas dan cergas.

Amalan budi bahasa

Sejak kebelakangan ini, amalan berbudi bahasa semakin kurang diamalkan oleh rakyat Malaysia. Budi bahasa sangat penting dalam kehidupan seharian. Budi dan bahasa adalah dua elemen yang berkait rapat dalam pembinaan jati diri sesebuah masyarakat. Budi adalah kelakuan yang baik, manakala bahasa merupakan percakapan dan tingkah laku yang sopan santun.

Budi bahasa yang baik dapat mengeratkan hubungan sesama masyarakat. Sejak kebelakangan ini, ia semakin kurang diamalkan kerana kurangnya didikan tentang amalan ini di peringkat keluarga. Jika amalan ini tidak dididik sejak kecil, rakyat Malaysia akan hilang budi bahasanya. Contohnya, remaja hari ini kurang mengamalkan pemberian salam kepada orang tua. Oleh yang demikian, ibu bapa haruslah memainkan peranan mendidik anak-anak tentang amalan berbudi bahasa.

Selain itu, amalan berbudi bahasa kurang diamalkan kerana segelintir rakyat kita sudah tidak lagi mempunyai sifat baik. Sebaliknya, jiwa mereka dipenuhi sifat sombong, angkuh, meninggi diri dan angkuh. Orang yang mementingkan diri sendiri dapat dilihat di jalan-jalan raya. Para pemandu yang memandu laju dan tidak bertimbang rasa menunjukkan diri mereka tidak mempunyai budi bahasa yang sepatutnya. Ada sesetengah remaja tanpa segan silu berasmara di khalayak ramai tanpa memperdulikan orang sekeliling. Akibatnya, bercambahlah bilangan bayi hasil daripada hubungan terlarang. Tanpa sifat malu dan adab sopan, gejala rasuah dan jenayah kolar putih juga mengakibatkan kerugian kepada negara.

Seharusnya kita mengamalkan sifat terpuji seperti lemah lembut, menghormati orang lain dan berhemah tinggi kerana ia dapat melahirkan rasa kasih mesra sesama manusia tidak kira bangsa, agama, usia, taraf atau warna kulit.

Sikap masyarakat Malaysia yang semakin kurang menitikberatkan amalan berbudi bahasa boleh dibantu oleh peranan media massa. Media cetak dan media elektronik harus berganding bahu menyiarkan berita atau kempen kesedaran akan perlunya budi bahasa dalam masyarakat. Melalui kerjasama semua pihak, amalan budi bahasa yang semakin terhakis dapat disuburkan kembali dalam kalangan masyarakat di negara ini.

Pihak sekolah sebagai institusi sosial, tidak hanya berperanan sebagai pusat persediaan peperiksaan. Kempen budi bahasa di peringkat sekolah dapat membantu menyedarkan pelajar untuk menjadi remaja yang berbudi bahasa. Tuntasnya, peranan guru di sekolah juga amat penting dalam meningkatkan amalan budi bahasa.

Setiap warga masyarakat yang mempunyai budi bahasa, akan dipandang tinggi dan mulia. Orang lain juga akan lebih menghormati dan senang bergaul dengan mereka

yang mengamalkan budi bahasa. Harta kekayaan, rupa paras dan darjat tidak menjamin seseorang itu dihormati dan disegani.

Oleh hal yang demikian, marilah kita bersama-sama memupuk amalan budi bahasa kerana ia dapat disemai dan dibajai, ia juga tidak dapat dijual beli. Pepatah ada menyatakan, ♦ yang kurik itu kendi, yang merah itu saga, yang baik itu budi, yang indah itu bahasa. ♦ Asas kesedaran terhadap budi bahasa harus disemai sejak kecil bak kata pepatah, jika melentur buluh, biarlah dari rebungunya

Ramalan 18

Amalan jimat cermat

Boros bermakna suka mengeluarkan sesuatu seperti wang secara berlebih-lebihan manakala jimat cermat pula bermaksud sangat berhati-hati dalam membelanjakan wang. Perkara ini berkaitan dengan pepatah Melayu yang menyatakan "ingat sebelum kena, jimat sebelum habis". Hal ini membuktikan bahawa sikap berjimat cermat merupakan amalan yang mulia dan memberi banyak manfaat kepada setiap lapisan masyarakat.

Faedah berjimat cermat yang pertama ialah dapat **menjamin masa depan yang lebih baik**. Seseorang yang ada wang simpanan tidak perlu lagi membanting tulang apabila sudah bergelar warga emas. Mereka boleh menggunakan wang tersebut untuk meneruskan kehidupan tanpa meminta bantuan daripada sesiapa walaupun kepada anak-anak sendiri kerana anak-anak mempunyai tanggungjawab mereka sendiri. Melalui perkara ini, jelaslah bahawa orang yang berjimat cermat lebih selesa hidupnya berbanding dengan orang yang boros.

Selain itu, antara faedah amalan berjimat cermat termasuklah **membantu para pelajar untuk melanjutkan pelajaran pada masa hadapan**. Hal ini demikian kerana yuran pengajian semakin mahal. Oleh yang demikian, ibu bapa yang bijak merancang akan mula membuat simpanan untuk anak-anak sejak awal-awal lagi bak kata peribahasa "sedikit-sedikit, lama-lama menjadi bukit". Berdasarkan perkara yang dibincangkan ini, jelaslah bahawa sikap berjimat cermat akan dapat membantu kita melanjutkan pelajaran ke menara gading.

Di samping itu, manfaat amalan berjimat cermat yang ketiga ialah **membantu kita pada masa kecemasan**. Jika kita tiba-tiba diserang penyakit kronik seperti strok, sakit jantung dan sebagainya, kita memerlukan rawatan segera. Kos pembiayaan rawatan untuk penyakit-penyakit seperti ini boleh mencecah puluhan ribu ringgit. Kita banyak melihat pesakit yang menunggu sekian lama untuk menerima rawatan hanya kerana tidak cukup wang. Oleh hal yang demikian, mereka yang mempunyai simpanan tidak akan menghadapi sebarang halangan untuk menbiayai kos rawatan.

Sebagai kesimpulannya, dapatlah dibuktikan bahawa sikap jimat cermat banyak memberikan faedah. Oleh hal yang demikian, kita hendaklah sediakan payung sebelum hujan agar perkara kecemasan yang tidak diduga dapat dihadapi dengan tabah. Oleh itu, marilah kita mengamalkan amalan mulia ini kerana amalan ini memberi banyak manfaat.

Ramalan 19

Kepentingan Air

Air merupakan keperluan utama hidupan di muka bumi ini. Manusia, tumbuh-tumbuhan dan binatang memerlukan air untuk meneruskan kehidupan.

Air ialah **sumber minuman** kerana **tanpa air hidupan akan mati**. Sumber minuman ini boleh didapati daripada aliran anak sungai dan diproses sebelum boleh digunakan. Tumbuhan pula bergantung kepada air hujan supaya dapat hidup dengan subur dan menjalankan proses **fotosintesis**.

Selain itu, manusia juga menggunakan air untuk **menjalani kehidupan seharian**. Contohnya untuk memasak, mandi, mencuci dan sebagainya. Tanpa air, kehidupan manusia akan terjejas dan akan berlakulah kekalutan untuk mendapatkan air.

Air juga adalah **sumber penting kepada para petani untuk tanaman mereka**. Tanpa air, tanaman akan kering dan layu serta terjejaslah sumber pendapatan para petani. Manusia juga akan mendapat kesusahan kerana kekurangan sumber makanan yang berasaskan sayur-sayuran dan **bijirin**.

Di samping itu, **kilang-kilang juga sangat memerlukan air dalam penghasilan produk mereka**. Contohnya kilang yang membuat ais, minuman dan makanan. Tanpa air, operasi kilang akan terhenti dan pastinya menyebabkan kerugian yang besar kepada pekilang.

Kesimpulannya, air adalah sumber semula jadi yang sangat penting dan berkaitan dengan kehidupan manusia. Namun, sebagai pengguna kita hendaklah berjimat semasa menggunakan air supaya tidak berlaku pembaziran.

Ramalan 20

Kepentingan ICT

Dalam mendepani arus globalisasi, Malaysia telah berjaya berdiri sama tinggi, duduk sama rendah dengan negara-negara maju yang lain. Hal ini demikian kerana pelbagai kemudahan teknologi yang dicipta marcapada ibarat cendawan tumbuh selepas hujan apabila manusia berlumba-lumba untuk **mencipta teknologi yang memudahkan kehidupan seharian.**

Terdapat pelbagai kepentingan prima penggunaan teknologi maklumat dalam kehidupan manusia. Antaranya ialah **memudahkan manusia untuk mendapatkan maklumat di hujung jari** terutama dalam kalangan pelajar. Menerusi teknologi maklumat ini, manusia akan dapat mempelajari pelbagai maklumat keduniaan yang dapat membuka dan meluaskan minda mereka. Selain maklumat pendidikan, kita juga dapat mencari maklumat mengenai hiburan, isu-isu politik dan sebagainya.

Selain itu, manusia juga dapat **berkomunikasi antara satu sama lain tanpa sempadan.** Pengenalan mengenai laman sosial seperti "Facebook", "Twitter", "Friendster" dan sebagainya telah menghubungkan manusia dengan dunia luar. Sebagai contoh seseorang yang berada di luar negara sama ada atas urusan perniagaan atau menuntut ilmu dapat melepaskan rindu serta bertanya khabar kepada keluarga tercinta yang berada di perantauan hanya dengan menggunakan teknologi laman sosial.

Seterusnya, teknologi maklumat ini juga **memudahkan ahli perniagaan menjalankan aktiviti perniagaan mereka hanya di dalam talian sahaja sekaligus dapat menjimatkan kos dan tenaga.** Aktiviti perniagaan yang dijalankan melalui talian bukan sahaja dapat memudahkan urusan pekerja, bahkan ia juga dapat memudahkan pembeli atau pengguna.

Akhir sekali, manusia dapat melakukan **pembayaran bil dan urusan perbankan melalui laman sesawang** sahaja. Manusia tidak perlu menghabiskan tenaga dan bersusah-payah untuk menguruskan pelbagai pembayaran dan urusan-urusan kewangan. Ia juga memudahkan seseorang yang terlalu sibuk dengan kerja seharian membuat pembayaran dengan mudah.

Kesimpulannya, teknologi maklumat yang ada marcapada memainkan peranan vital kepada setiap manusia. Teknologi maklumat ini haruslah digunakan dengan sebaik yang mungkin kerana banyak manfaat yang dapat kita peroleh menerusi peranan teknologi maklumat itu sendiri.

Ramalan 21

Kebaikan belajar secara berkumpulan

Murid mempunyai cara yang tersendiri untuk mengulang kaji pelajaran mereka . Ada yang suka belajar di perpustakaan ,di rumah dan ada juga yang suka belajar secara bersendirian. Antara teknik belajar yang begitu popular dalam kalangan murid-murid sekolah pada masa sekarang ialah belajar dalam berkumpulan.

Belajar secara berkumpulan adalah lebih baik jika dibandingkan dengan belajar berseorangan. **Penerangan dan perbincangan dengan kawan-kawan akan membuat kita lebih mudah mengingati apa yang dipelajari.** Kesannya, sesuatu pelajaran itu akan sentiasa kekal di dalam minda kita.

Belajar secara berkumpula juga **tidak membosankan** .Perbincangan yang dibuat akan menjadikan kita **lebih bersemangat dan berminat untuk belajar**. Ini kerana suasana pembelajaran tidak kaku dan kita boleh bercakap untuk menyuarakan pendapat.

Kita juga akan **memperoleh maklumat yang lebih banyak dan mendalam** kerana rakan-rakan dalam kumpulan tersebut membaca buku rujukan yang berlainan tentang tajuk yang dibincangkan. Dengan ini semua maklumat tersebut dapat dikongsi bersama. Kesannya, sesuatu tajuk itu akan dapat difahami dengan lebih mendalam.

Kesimpulannya, belajar secara berkumpulan lebih banyak membantu murid-murid memahami sesuatu tajuk dengan berkesan berbanding dengan belajar secara bersendirian. Oleh itu, murid-murid boleh memilih kaedah pembelajaran yang bersesuaian untuk mencapai kecemerlangan.

Ramalan 22

Kebaikan amalan bantu-membantu

- **sesuatu pekerjaan dapat dilakukan dengan lebih mudah** - berganding bahu ibarat aur dengan tebing
- **menjimatkan masa dan tenaga** - kerja yang dilakukan cepat siap
- **menjimatkan belanja** - jika sesebuah majlis perkahwinan dibuat secara gotong-royong (tolong-menolong), tidak perlu membayar upah pekerja, katering atau kos penyediaan makanan, kos pembinaan balai raya/surau di kawasan kediaman dapat dijimatkan jika penduduk saling menolong membinanya.
- **memupuk nilai-nilai murni dalam kehidupan** - belajar bekerjasama, bertoleransi dan bergaul mesra dengan anggota masyarakat
- **mengikis sifat mementingkan diri**
- **mengeratkan silaturahim/hubungan sesama anggota masyarakat**
- **mewujudkan perpaduan kaum** - masyarakat hidup harmoni - saling membantu tanpa mengira warna kulit, bangsa atau agama
- **meringankan beban orang lain** - golongan yang senang akan membantu golongan yang susah - kesejahteraan dan keharmonian dapat dikekalkan.

Ramalan 23

Cara-cara menjaga kesihatan diri

Kesihatan merupakan anugerah Tuhan yang tidak ternilai. Oleh itu, kita seharusnya menjaga kesihatan dengan langkah yang efektif.

Antara langkah yang boleh diambil dalam usaha menjalani kehidupan yang sihat termasuklah dengan mengamalkan **pemakanan yang seimbang**. Pemakanan yang seimbang mestilah berpandukan kepada piramid makanan. Kita disarankan supaya mengambil lebih banyak sayur-sayuran dan buah-buahan yang berperanan membekalkan pelbagai jenis mineral dan vitamin kepada tubuh badan kita. Di samping itu, kita mestilah mengurangkan makanan yang berlemak supaya tidak mendapat penyakit seperti diabetes dan penyakit jantung.

Selain itu, kita mestilah **mengamalkan amalan bersukan dan bersenam**. Seseorang individu mestilah menjalankan aktiviti fizikal seperti bersenam sekurang-kurangnya tiga kali dalam seminggu dan 20 minit bagi setiap sesi. Hal ini demikian kerana bersenam akan dapat menyihatkan tubuh badan di samping meningkatkan tahap kecergasan fizikal.

Tambahan pula, kita mestilah **menjalani pemeriksaan kesihatan sekurang-kurangnya dua kali dalam setahun**. Hal ini bertujuan untuk memastikan tubuh badan berada dalam keadaan yang baik tanpa sebarang penyakit. Pemeriksaan kesihatan mestilah kerap dilakukan supaya dapat memulakan rawatan dari peringkat awal sekiranya didapati menghidap sebarang penyakit.

Di samping itu, setiap individu mestilah **mendapatkan tidur dan rehat yang mencukupi**. Dalam kesibukan menjalani aktiviti harian, keperluan tubuh badan tidak wajar diabaikan. Tubuh badan kita memerlukan rehat yang secukupnya untuk terus berfungsi dengan baik. Tanpa rehat yang secukupnya, tubuh badan akan menjadi letih dan lesu sekaligus menyebabkan semua aktiviti tergendala. Oleh itu, rehat dan tidur yang cukup amat diperlukan.

Akhir sekali, kita mestilah menjaga kesihatan dengan baik sejak peringkat awal lagi. Sesungguhnya, kesihatan adalah anugerah Tuhan yang perlu dihargai. Jangan nanti terhantuk baru terngadah kerana sesal dahulu pendapatan, sesal kemudian tidak berguna.

Ramalan 24

Cara-cara menjaga keselamatan diri

Pendahuluan

– Nyawa amat berharga-tidak dapat ditukar dengan wang ringgit

Idea 1

-Mematuhi undang-undang jalan raya

Idea 2

-Menggunakan kemudahan yang disediakan – jejantas/garisan belang

Idea 3

-Bertimbang rasa –sabar memandu di jalan raya

Idea 4

-Pastikan kenderaan sentiasa dalam keadaan baik- memeriksa kenderaan sebelum memulakan perjalanan

Penutup

-Ingatlah orang tersayang-berhati-hati di jalan raya.

Pada masa kini, sering berlaku kemalangan di jalan raya. Banyak faktor yang menjadi penyebabnya. Orang ramai sudah tidak menitik beratkan keselamatan diri di jalan raya. Berikut merupakan cara-cara untuk menjaga keselamatan diri di jalan raya.

Pertama, kita mestilah mengikut peraturan dan undang-undang yang telah digubal di jalan raya. Kelajuan kenderaan harus dipatuhi mengikut had laju yang telah disediakan. Kita juga harus mengikut lampu isyarat ketika memandu untuk mengelakkan kemalangan di jalan raya. Dengan kedua-dua cara ini kita dapat menjadi pengguna jalan raya yang bijak selain dapat mengelakkan kemalangan.

Persediaan yang secukupnya juga merupakan salah satu cara untuk menjaga keselamatan diri di jalan raya. Kita mesti memastikan kenderaan kita berada dalam keadaan selamat serta sudah bersedia untuk perjalanan jauh. Persediaan diri juga harus dijaga agar dapat menjamin keselamatan diri. Sebelum memandu, kita perlu mendapat tidur yang secukupnya supaya tidak mengantuk ketika memandu. Kita juga tidak digalakkan untuk memandu sekiranya berasa pening.

Kita juga mestilah menggunakan jejantas untuk melintas jalan. Ramai yang tidak suka menggunakan jejantas kerana lambat. Keselamatan diri sangat penting dan amat bermakna kepada kita. Segelintir orang tidak suka menggunakan jejantas dan sanggup menaruh risiko yang tinggi berdepan kemalangan. Nyawa mereka akan tergadai begitu sahaja sekiranya tidak menggunakan jejantas untuk melintas jalan yang sibuk.

Kesimpulannya terdapat pelbagai cara untuk menjaga keselamatan diri di jalan raya. Oleh itu tukarkanlah keadaan jalan raya untuk kesejahteraan hidup. Anda mampu mengubahnya.

Ramalan 25

Cara menghormati ibu bapa

Ibu bapa ialah insan yang sangat penting dalam kehidupan kita. Tanpa mereka kita tidak akan berpeluang merasa nikmat kehidupan di muka bumi ini. Justeru sebagai seorang anak, kita perlulah sentiasa menghormati mereka.

Terdapat banyak cara yang boleh kita lakukan sebagai tanda menghormati mereka. Antaranya ialah dengan menunjukkan **kepatuhan dan ketaatan kepada mereka**. Sebagai ibu bapa mereka akan menentukan apa yang terbaik untuk anak-anak. Sudah semestinya setiap keputusan atau pilihan yang mereka lakukan adalah bertujuan untuk kebaikan kita. Tidak ada mana-mana ibu bapa di dunia ini pun yang bertindak atau membuat keputusan yang boleh merosakkan kehidupan anak-anak.

Kita juga boleh menunjukkan rasa hormat kepada mereka dengan **cara mendengar nasihat dan menerima setiap teguran daripada mereka dengan hati yang terbuka**. Sebagai manusia biasa kita tidak mungkin lari daripada tersilap langkah dan melakukan kesilapan. Nasihat dan teguran mereka bertujuan untuk memberi bimbingan dan panduan demi kebaikan kita sendiri.

Di samping itu, **belajar bersungguh-sungguh dalam pelajaran** juga merupakan satu cara yang boleh kita lakukan sebagai tanda menghormati ibu bapa. Ibu bapa telah bersusah payah melahirkan kita, membesarkan dan memberi pendidikan kepada kita. Mereka bermandi peluh untuk menyara dan membesarkan serta bersenggang mata menjaga kita ketika kita sakit. Sebagai membalas jasa mereka, kita hendaklah belajar bersungguh-sungguh agar berjaya mencapai cita-cita. Kejayaan dalam pelajaran pastinya akan membuatkan ibu bapa kita berasa bangga dan gembira.

Selain itu, **membantu ibu bapa melakukan kerja-kerja rumah yang bersesuaian** seperti mengemas rumah, mencuci pinggan mangkuk selepas makan, membersihkan halaman rumah serta membantu menjaga adik juga adalah merupakan satu lagi cara menunjukkan rasa hormat dan kasih sayang terhadap mereka. Bantuan kita dapat meringankan beban tugas serta keletihan mereka bekerja seharian. Mereka tentunya berasa gembira dan bangga mempunyai anak-anak yang ringan tulang.

Secara ringkasnya dapatlah dirumuskan bahawa terdapat banyak cara untuk menunjukkan rasa hormat kepada kedua-dua ibu bapa kita. Menghormati dan membalas jasa ibu bapa merupakan tanggungjawab anak-anak dan ia juga dituntut oleh agama. Hormati dan sayangilah ibu bapa sementara mereka masih ada.